

INUIT ATAQATIGIIT

Inatsisartuni



22. juli 2019

UKA2019/040

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Iqalunnut timmisartukkut pisortat aallarnigaannik aqquteqaqqilissappat tapeeriutsit assigiinngitsut qanoq ittut pisortanut, namminersortunut innuttaasunullu aningaasatigut kingunissaasa takussutissartaannik kingusinnerpaamik UKA2020-imi Inatsisartunut agguanneqartussamik Naalackersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut Ilaasortaq Mimi Karlsen, Inuit Ataqatigiit)

Tunngavilersuut:

Juli 2019 aallartisimalersoq Naalackersuisut kimmut silaannakkut aqqutit pillugit missueqqissaarsimanertik Inatsisartut aalajangerannit UPA2017/103-mit aallaaveqartoq saqqummiuppaat. Tassani kitaanut ullumikkut timmisartukkut aqquteqaqqilernissaa anguniarlugu politikikkut aalajangertoqassagaluarpat tapeeriutsit suut atorreqarsinnaaneri taakkartorneqarput.

Anguniarpara Iqalunnut timmisartukkut aqquteqaleqqissappat nunatta karsianit aningaasaleeriutsit assigiinngitsut Naalackersuisunit takussutissiingorlugit saqqummiunneqarnissaat.

Takussutissiami Naalackersuisut misissueqqissaarsimaneranni taaguuserneqarsimasumi Kimmuinnaq timmisartukkut aqqutit (Flyruter mod vest) tapeeriutsit taakkartorneqarsimasut assigiinngitsut aallaavigalugit, Iqalunnut timmisartukkut aqquteqalissappat tapeeriutsit ataasiakkaat qanoq aningaasartaqarumaaneri, tapeeriutsillu taakku ataasiakkaat Naalackersuisut namminneq isumartik naapertorlugu akuleriiaarlugit pitsaanerusorisartik atorlugu suliaqarnissaat anguniarpara.

Nagguqatigiit Inuit nunanut sisamanut avinneqarsimavugut.

Ulluinnarni immitsinnut tikeraarsinnaanngilagut. Kulturitsinnik oqaatsitsinnillu ineriartortitseqatigiissinnaanerput taamaalilluni killeqarpoq. Ilaqutariit Canadami Kalaallillu Nunaanni najugallit aningaasarpasuit atorlugit nunat allat aqqusaartoqqaarlugit aatsaat immitsinnut tikeraarsinnaavugut.

Inuiannut allanut sanilliutissagutta assignerusagut tassaapput Inuit Canadamiittut, Alaskamiittut, Ruslandimiittullu.

Ullutsinni aatsitassarsiornermi suliaqartut suliaminnut tunngatillugu Canadap nunattalu akornanni angalaniaat Danmark, imaluunniit Island aqqusaaqqaartariaqarpaat, uffa nunatsinniit Iqalunnut annerpaamik akunnerit marluk ingerlasinnaagaluarlutik.

Silaannakkut Canadamut attaveqarneq niuernikkut ineriartortitsilluarsinnaavoq.

Inatsisartut Angallanneq pillugu seminareqarnitsinni oqaatsitigut paasitineqarpugut Nuummit Iqalunnut timmisartuussisinnaaneq piuminartumik aqqineqarsinnaasoq. Tamanna Naalackersuisut misissortariaqarpaat Inatsisartunullu qanoq akeqassanersoq ilisimatitsissutigalugu.

Taamaammat Naalackersuisut Canadami Iqalunnut timmisartukkut aqquteqalernissaata qanoq akeqarumaarneranik suliniuteqaqqullugit Inatsisartut aalangiiffigisassaattut siunnersuuteqarpunga.

Naggueqatigiit Inuit attaveqatigiittuarnissarput pisariaqarpoq, avissaaqqati-innarneqarsinnaanngilagullu.

Pisortanut aningaasatigut allaffissornikkullu kingunerisassai:

Iqalunnut timmisartukkut aqquteqalernissaannik takussutissiilluni misissuineramik suliaqarnissaq AC-ip ukiumut naammassisinnaasaata affaanik naleqarnissaa naatsorsuutigineqarpoq. Tamatumunnga ilutigitillugu nutserinernut naqiterinermullu atuinerit Naalackersuisoqarfinnut aningaasaliissutit iluini naammassineqarsinnaasut naatsorsuutigineqarpoq.

Namminersortunut aningaasaatigut allaffissornikkullu kingunerisassai:

Soqanngilaq.

Innuttaasunut aningaasatigut allaffissornikkullu kingunerisassai:

Soqanngilaq.